

VASIJJET (OPORUKA) ALIJE, R.A.

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji primaju savjete.

Braćo moja u Dini Islamu! Počelo je odbrojavanje. Do početka mjeseca ramazana ostalo je još tačno tri sedmice. Zato, ako među našim sestrama ima onih koje još uvijek nisu napostile od prošlog ramazana, neka počnu sa napaštanjem. S druge strane, pred nama je prilika da, kao pripremu za ramazanski post, ispostimo koji dan mjeseca ša'bana. Lijepo je, korisno je, sunnet je.

A osim tjelesne pripreme, imamo priliku i za duševnu, tj. da osvježimo i napojimo svoje duše na predramazanskim manifestacijama. Naš susjedni džemat Heiden u nedjelju iza podne-namaza organizuje tradicionalnu manifestaciju pod nazivom "U susret ramazanu", dok će sličnu manifestaciju pod nazivom "Večer Kur'ana" održati naš susjedni džemat Bludenz u subotu 22. februara u 19 h. Oba domaćina nas pozivaju na druženje i nadaju se našoj posjeti.

A što se tiče hutbe, u sklopu naših priprema za doček mjeseca ramazana danas ćemo se malo osvježiti uz poruke četvrtog pravednog halife hzr. Alije, r.a.

Kada je Alija, r.a., 15. ramazana 40. god. po Hidžri izašao da klanja sabah-namaz, napadnut je i smrtno ranjen udarcem u glavu. Prije nego što je preselio pozvao je svoje sinove Hasana i Husejna, r.a., i rekao im: "Savjetujem vam da se bojite Allaha! Nemojte činite nepravdu, pa makar vam ona bila učinjena. Nemojte plakati za onim što vam je uskraćeno. Govorite istinu, budite milostivi prema siročetu i pomozite nevoljniku. Suprostavite se nasilniku, a pomozite onome kome je nasilje učinjeno. Radite po Kur'anu i po pitanju vjere ničijeg prijekora se ne bojte."

Nakon toga je naredio da se zapiše njegova oporuka: "Ovo je oporuka Alije sina Ebu Talibovog. Oporučujem da nema boga osim Allaha i da je Muhammed Njegov rob i Poslanik. Allah je po Svome Poslaniku poslao uputu i vjeru istinitu da bi je uzdigao iznad svih vjera, makar to ne bilo pravo mnogobošcima. Zatim, klanjanje moje, obredi moji, život moj i smrt moja zaista pripadaju Allahu, Gospodaru svjetova, On nema sudruga. To mi je naređeno i ja sam prvi musliman.

Čvrsto se Allahovog užeta držite i nemojte se razjedinjavati! Čuvajte rodbinske veze da bi vam Allah olakšao polaganja računa. Allaha mi, Allah je uz jetime pa im se nemojte rugati i nemojte ih udarati. Allaha mi, Allah je uz vaše komšije i oni su oporuka vašeg Poslanika, s.a.v.s., koji nije prestajao da nam ih spominje sve dok nismo pomislili da će komšije jedni druge naslijeđivati.

Allaha mi, Allah je uz Kur'an pa ne dozvolite da vas drugi preteknu u njegovom slijeđenju. Allaha mi, Allah vas gleda dok ste u džamijama pa ih ne ostavljajte prazne, jer ako su prazne neće biti nadgledane. Allaha mi, Allah pomaže u borbi na Njegovom putu kada založite svoje živote i imetke. Allaha mi, Allah je uz zekat, a zekat gasi Gospodarevu srdžbu.

Allaha mi, Allah je uz onoga koji brani Poslanika, s.a.v.s., pa ne dozvolite da bude napadnut u vašem prisustvu. Allaha mi, Allah je uz bijednika i siromaha, pa ih pozovite da im podijelite ono što je kod vas.

Allaha mi, Allah je uz vaše podanike. Namaz! Namaz! Ne bojte se u ime Allaha ničijeg prijekora. Govorite lijepe riječi, kao što vam je Allah to naredio. Ne ostavljajte naređivanje dobra i odvrćanje od zla, da vam vladari ne bi postali najgori među vama, pa ćete onda Allaha moliti ali vam se On neće odazvati. Dužnost vam je da se pazite i potpomažete, da ne izbjegavate jedan drugog, da ne prekidate međusobne odnose i da se ne razjedinjete. Pomažite se u dobročinstvu i čestitosti, a nemojte sudjelovati u grijehu i neprijateljstvu. Bojte se Allaha, jer Allah strašno kažnjava. Allah nek vas čuva, Poslanikovi, a.s., potomci, i neka vas čuva kao što je čuvao Svoga Poslanika. Molim Allaha da vam pomogne! Neka je na vas selam i milost Allahova!"

Osim ovih poruka, od Alije, r.a., se prenose i slijedeće:

"Pravo učenjaka je da mu priđeš i da ga posebno poselamiš, a zatim da ostale oko njega posebno poselamiš; da ispred njega sjedneš; da ne pokazuješ svojim rukama prema njemu; da mu se ne obraćaš mimikom i namigivanjem; da ne govoriš pred njim: 'Taj i taj zastupa stav suprotan tvom!'; da ga ne vučeš za odjeću; da ga ne ispituješ pretjerano. On je poput palme sa zrelim hurmama, pa zato pazi kako je bereš!"

"Nemoj nikoga pretjerano voljeti jer ti jednog dana može postati mrzak, i nemoj nikoga pretjerano mrziti jer ti jednog dana može postati drag!"

"Nemoj se družiti sa trojicom:

- Pokvarenjakom, jer će ti lijepim predstavljati svoja loša djela i bit će mu drago ako postaneš kao on. Znaj da je tvoje ulaženje kod njega i izlaženje od njega sramota za tebe!

- Glupim, jer će ti se maksimalno stavljati na raspolaganje ali ti neće biti od koristi, a nekad će ti htjeti pomoći, ali će ti odmoći. Njegova šutnja je bolja od njegovog govora, njegova daljina je bolja od njegove blizine, njegova smrt je bolja od njegovog života.

- Lažovom, jer ti život sa njim ne može biti od koristi. Prenosit će ti tuđe priče a i drugima prenositi tvoje, pa i kada bude istinu govorio neće mu se vjerovati!"

Neka se Dragi Allah smiluje Aliji, r.a., i bude zadovoljan njime, a nama neka dadne snage i mudrosti da njegove savjete primjenimo u svom životu. Amin.